

Bosna i Hercegovina
Federacija Bosne i Hercegovine
ZENIČKO-DOBOJSKI KANTON
OPĆINA MAGLAJ
OPĆINSKO VIJEĆE

Broj: 02-05-1-1056 /19
Datum, 31.05.2019.godine



Bosnia and Herzegovina
Federation of Bosnia and Herzegovina
ZENICA – DOBOJ CANTON
MAGLAJ MUNICIPALITY
MUNICIPAL COUNCIL

Z A P I S N I K

Sa 2. Vanredne sjednice Općinskog vijeća Maglaj održane dana 31.05.2019.godine u 09,00 sati u sali JU Dom kulture «Edhem Mulabdić» Maglaj

Predsjedavajuća OV, na osnovu člana 59,60 i 61. Poslovnika o radu Općinskog vijeća Maglaj, zaključaka Općinskog vijeća od 24.05.2019.godine, otvaram 2. Vanrednu sjednicu Općinskog vijeća Maglaj. Na današnju sjednicu pozvani su vijećnici iz parlamentarnih političkih stranaka SDA-a, SDP-a, SBB, DF, HDZ, samostalni vijećnici Mustafa Buljubašić, Mustafa Bešić, Fikret Delić, Elvir Vehabović i Kanita Bašić. Poziv za sjednicu i materijal dostavljeni su OSCE-u Terenskom uredu u Travniku i sredstvima informisanja koji prate rad današnje sjednice. Pozvan je i Načelnik općine, rukovodioci općinskih Službi, Općinska pravobraniteljica, kao i predstavnici čiji materijal će biti razmatran na današnjoj sjednici Općinskog vijeća. Na sjednicu su pozvani i zastupnik u Domu naroda gospodin Jasminko Kapić, kao i zastupnici u Skupštini ZDK gospođa Emira Drnda-Čičeklić i gospodin Jasminko Kapić. Sve vas pozdravljam i pozivam da svako na sebi svojstven način odamo dužnu počast onima koji su svoje živote ugradili u zemlju, domovinu nam Bosnu i Hercegovinu i svim žrtvama rata. Molim predstavnika Službe Općinskog načelnika i Općinskog vijeća da prozivkom vijećnika utvrdimo broj vijećnika na 2. Vanrednoj sjednici Općinskog vijeća. Današnjoj sjednici Općinskog vijeća prisustvuje 24 vijećnika. Nije prisutan vijećnik Hrnjić Armin – opravdao izostanak. Konstatujem da Općinsko vijeće može punovažno raditi i odlučivati i donositi odluke, zaključke i rješenja. Ovim je ispoštovan član 88. Poslovnika o radu Općinskog vijeća Maglaj. Kao što smo se usaglasili na prethodnoj 28. redovnoj sjednici započet ćemo sa održavanjem 2. Vanredne sjednice, a u nastavku ćemo održati nastavak 28. redovne sjednice OV. Za 2. Vanrednu sjednicu predlažem

D N E V N I R E D

1. Konačni izvještaj o procijenjenoj šteti uzrokovanoj obilnim padavinama – poplave i klizišta dana 13.05.2019.godine;

Glasalo 24 glasova za: Svjetlana Zamboni, Nedžad Lokmić, Mirza Bradarić, Anida Šahman, Irena Herceg, Firuz Galijašević (SDP), Muhamed Hrnjić, (SBB), Elvir Vehabović (SBiH), Hajrudin Fermić (DF) Mustafa Bešić, Fikret Delić, Kanita Bašić samostalni vijećnici, Josip Jurišić (HDZ), Adis Abdurahmanović, Nedžad Alispahić, Selma Avdić, Mirsad Bejzić, Delić Edib, Hasanić Šefka, Safet Jašić, Edina Jašić, Smajlović Dženita, Ermina Muminović (SDA), Mustafa Buljubašić, samostalni vijećnik.

AD 1. - Konačni izvještaj o procijenjenoj šteti uzrokovanoj obilnim padavinama – poplave i klizišta dana 13.05.2019.godine;

Senada Alibajraktarević, pred nama je Konačan izvještaj o procijenjenoj šteti uzrokovanoj obilnim padavinama koje su se desile na području općine Maglaj dana 13.05.2019.godine.

Kao što je poznato 13.05.2019.godine proglašeno je stanje prirodne nesreće – poplava i klizišta i samim proglašenjem Načelnik općine je imenovao Komisije koje su trebale izvršiti procjenu šteta na stambenim i pomoćnim objektima, na privrednim objektima, na putnoj infrastrukturi, na poljoprivrednoj infrastrukturi i na privrednim objektima, a sve u skladu sa Uredbom o jedinstvenoj metodologiji o procjeni šteta od prirodne nesreće. Stručne komisije su izvršile procjenu nastalih šteta na terenu, sačinile Š obrasce i dostavile Centralnoj komisiji koja je sačinila ovaj Konačan izvještaj.

Kao što ste mogli vidjeti u materijalima konačna procijenjena šteta na stambenim i pomoćnim objektima, privrednim objektima, infrastrukturnim objektima i poljoprivrednoj infrastrukturi je procijenjena na 3.712.092,00 KM. Kada posmatramo analitički procijenjena šteta na stambenim, pomoćnim objektima i poslovnim prostorima

je procijenjena na 1.959.715,00 KM. Kada je riječ o putnoj infrastrukturi njihova procjena na uništenim i lokalnim putevima i mostovima je 1.094.737,00 KM. Kada je riječ o procijenjenim štetama u poljoprivredi u zemljištu, opremi, dugogodišnjim nasadima voća, životinjama, peradi, te obrtnim sredstvima ona je procijenjena na 216.272,00 KM. Ukupno procijenjena šteta na privrednim subjektima, a tu smo uzeli u obzir opremu, obrtna sredstva i troškove, iznosila je 393.763,00 KM. Ostali troškovi vezani za proglašenje ove elementarne nepogode – poplave i klizišta iznosili su 47.605,00 KM. Ono što bih napomenula u uvodnom izlaganju je da ljudskih žrtava i povrijeđenih osoba nije bilo, niti oboljelih izazvanih ovom izvanrednom okolnosti. Prirodnom nesrećom su bila zahvaćena 83 domaćinstva, ukupno 175 članova. Nastava se odvijala normalno u svim školama, sem u područnoj školi OŠ „Maglaj“ u Gornjoj Liješnici i prekinuta je bila u periodu od 14.05. do 17.05.2019.godine. Pripadnici PVJ Maglaj pomogli su kod privremenog izmještanja 10 ugroženih lica i njihove imovine u Mjesnoj zajednici Liješnica n/m Međići i Salkići.

Što se tiče ove prirodne nesreće OpšCZ je izdao Naredbu da se angažuje mehanizacija, ljudstvo, četiri naša privredna subjekta: KJD Maglaj, „Hajdić“ Maglaj, „Geo-put“ Maglaj i „Euro put“ Maglaj.

Što se tiče pomoći sa viših nivoa u smislu finansijske pomoći, općini Maglaj do danas nije još bilo.

U materijalu imate detaljno obrazloženje sa tabelama od 1-8 sa svim procijenjenim štetama, a fotografije su snimljene na CD i sva ta potrebna dokumentacija, Š-obraci, sve se nalazi u Službi CZ i svu tu potrebnu dokumentaciju je potrebno dostaviti Kantonalnoj komisiji za procjenu šteta i Federalnom zavodu za statistiku.

Otvaram raspravu.

Vijećnik Mirza Bradarić, Kada je u pitanju ovaj Konačni Izvještaj o procijenjenoj šteti uzrokovanoj obilnim padavinama – poplave i klizišta od 13.05.2019.godine, ja ću reći da će Klub SDP-a naravno prihvatiti ovaj Izvještaj u nadi kako bismo što prije mogli prosljediti ovaj Izvještaj prema kantonu, federaciji itd. i naravno u nadi da će barem biti dobrog razumijevanja od strane i kantonalne i federalne vlasti, pa čak možda i državne vlasti kako bi se ovim ljudima koji su ponovo nakon 5 godina nakon 2014.godine oštećeni u ovim elementarnim nepogodama i naravno u svakom slučaju, ako ova sredstva i dođu i koliko god da dođe dobro je došlo, a nadamo se da će dobrim dijelom doći ta pomoć. Mala sugestija, da to što korektnije bude raspoređeno, podijeljeno ljudima kako ne bismo imali onih nezgodnih situacija koje smo imali prilikom podjela tih sredstava u 2014.godini.

Vijećnik Safet Jašić, kada je u pitanju Konačan izvještaj po procijenjenoj šteti uzrokovanoj obilnim padavinama – poplave i klizišta dana 13.05.2019.godine, reći ću slijedeće.

Prošli puta smo iznijeli stavove Kluba i nešto malo je uvaženo što se tiče naših prijedloga, sugestija itd..Međutim, većina toga nije, ne vidim ovdje u ovom konačnom izvještaju. Možda ću ponoviti neka od tih pitanja i sugestija, tako da ne budem dosadan, ali takva je situacija.

Ne želimo politizirati ovu situaciju jer nam je na prvom mjestu interes građana i pomoć istim kao i pomoć privrednim subjektima u sanaciji šteta na infrastrukturi, koja je nastala uslijed ove elementarne nepogode od 13.05.2019.godine.

Otprilike ću pročitati ono što tražimo, a ono što nije sa prošle sjednice ušlo u ovaj Konačan izvještaj.

Da se navede tačno ko su vlasnici 83 stambena objekta poplavljena i mjesne zajednice u kojoj se nalazi stambeni objekat. Obzirom da nam do danas niste dostavili informaciju, a tražili smo to da uradite na prošloj sjednici, da uradite do ove naredne sjednice, da nam se to predstavi u ovom izvještaju.

Da se tačno navedu pomoćni objekti na kojima je pričinjena šteta i vlasnici istih i mjesne zajednice u kojima su isti locirani.

Naveli ste putne dionice na kojima je pričinjena šteta, a potpuno je jasno da na najvećem dijelu ovih navedenih putnih dionica nije bilo štete od ove elementarne nepogode od 13.05.2019.godine.

Zbog čega nije navedena šteta u prostorijama NK „Novi Šeher“, Udruženje „Cicmanka“ i nogometnog terena na stadionu u Novom Šeheru, iako je jasno da je novoizgrađeni poligon uzrok poplave nekoliko stambenih objekata i terena i prostorija na stadionu.

Ponavljamo da smo tražili da nam se ove informacije dostave do slijedeće sjednice.

Ponovo tražimo da se utvrde principi, kriteriji i mjerila za sanaciju šteta od poplava kada su u pitanju stambeni objekti.

Ponovo tražimo da se tačno navedu nova klizišta koja su se pojavila uslijed ove elementarne nepogode, sa tačnom lokacijom odnosno u kojoj MZ se nalazi svako novo klizište, obzirom da to nije navedeno u Konačnom izvještaju. Ponovo tražimo da nam se dostave i vladinih i nevladinih institucija od kojih je Općina Maglaj tražila pomoć za sanaciju šteta, a ne da samo optužujete i čekate sredstva od viših nivoa. Pitanje da li se obratilo ili nije.

Tražimo da nam odgovorite koliko sredstava iz općinskog Budžeta je do sada utrošeno u sanaciju nastalih šteta.

Ponavljam da već tri godine Klub SDA stalno traži da se povećaju sredstva u Budžetu za izradu projektne dokumentacije za sanaciju postojećih klizišta, ali ste vi na ova naša traženja ostajali i gluhi i nijemi. Još jednom insistiramo da se odmah pristupi izradi rebalansa Budžeta i da se obezbijede sredstva za izradu projektne dokumentacije za stara, a i nova klizišta koja ugrožavaju putne komunikacije, stambene objekte. Pitamo, koliko ste projekata za sanaciju klizišta uradili za ove tri godine i koliko je sanirano klizišta u ovom periodu?

Predložili smo i tražili da se za sva 83 vlasnika poplavljenih objekata isplati najmanje po 1.000,00 KM iz Budžeta Općine kao inicijalna sredstva za sanaciju šteta. A naše mišljenje je da je svaki objekat koji je poplavljen morao pretrpjeti štetu od najmanje 1.000,00 KM i da se pri tom ne čeka da se prvo naprave principi, kriteriji i mjerila.

Ponovo tražimo da za jednokratnu novčanu pomoć, izradu projektne dokumentacije, sanacije klizišta sredstava izdvoje kroz rebalans Budžeta koji treba dostaviti po hitnom postupku na Općinsko vijeće.

Tražimo da nam se dostavi informacija na osnovu koje je proglašena elementarna nepogoda poplava i klizišta i u Donjem Rakovcu, Kosovi, Ulišnjaku, kako je to navela i Mjesna zajednica Liješnica u svom dopisu koji vam je upućen i da li se možda radi o sredstvima koja su potrebna za sanaciju starih klizišta, a ne klizišta koja je izazvala ova elementarna nepogoda od 13.05.2019.godine ili se radi o asfaltiranju putnih pravaca koje ste obećali u pred izbornoj kampanji.

Ponovo tražimo da svaka naredna sjednica OP kao prvu tačku dnevnog reda ima Informacija o sanaciji šteta uzrokovanih u elementarnoj nepogodi od 13.05.2019.godine i da nam za prvu narednu sjednicu dostavite informacije koje smo tražili i pripremite rebalans Budžeta po hitnoj proceduri, a za projektovanje i sanaciju klizišta te jednokratnu novčanu pomoć od po 1.000,00 KM za svaki stambeni objekat pojedinačno.

Pitamo, da li je moguće da ste predvidjeli 10.000,00 KM za rad Komisija koje ste formirali za popis nastalih šteta, umjesto da rad u redovno radno vrijeme bude naplaćen kao redovan rad, a za eventualni rad općinskih uposlenika poslije radnog vremena ili u neradne dane vikenda date korištenje slobodnih dana, a za 10 vlasnika poplavljenih objekata koji su najugroženiji isplatite po 1.000,00 KM. Ovo je stav Kluba i samo smo iznijeli ono što nije ušlo s protekle sjednice OV u konačan izvještaj.

Vijećnica Edina Jašić, na strani 9. se nalazi tabelarni prikaz na putnoj infrastrukturi. Ja ću nabrojati neka od putnih pravaca, to su Bijela Ploča-Jablanica-Donji Rakovac. Jablanica – Gornji Rakovac, Borik – Gornji Ulišnjak, Donji Ulišnjak-Straište, Donja Kosova-Topola-Šljivice. Donji Moševac-Gornji Moševac-Ravna. Bistrica-Ravna. Ravna – Oručje, Misurići-Ošve-Oručje. Iznos potreban za sanaciju šteta na ovim putnim pravcima je 914.752,00 KM, od ukupnog 1.094.737,00 KM.

Svi smo primjetili da se ovdje nalaze putni pravci u nekim mjesnim zajednicama koje poplava od 13.05. uopšte nije ni zahvatila. U nastavku se nalaze slijedeći putni pravci: Liješnica-Gornji Bradići, Gornja Liješnica-Mlin-Tujnica. Novi Šeher-Strupina-Tujnica, Novi Šeher-Čobe-Kopice, Novi Šeher-Domislica-Brezove Dane. Novi Šeher-Galovac-Tujnica-Mladoševica-Brezove Dane. Za ove putne pravce treba da se izdvoji 179.984,00 KM. Pet puta manji iznos nego za prethodne dionice puta za koje znamo da ova poplava nije uopšte ni zahvatila.

Nešto zanimljivo što mi je zapelo za oko, pa ako neko može da objasni.

Vijećnik Hajrudin Ferić, želim da iznesem u nekoliko rečenica stav političkog subjekta kojeg predstavljam i bit će par konkretnih nekih prijedloga koji idu u pravcu diskusije i kolege Bradarića i kolege Jašića.

Želim samo istaći prvo i odmah na početku da ću ja prihvatiti Konačni izvještaj iz prostog razloga, što nema ni jednog razloga da ne vjerujem stručnoj Komisiji i stručnim podkomisijama ili komisijama i ako se sjetimo na svakom od ovih akata kojeg dobijamo iz Službe za urbanizam, geodetske i imovinsko pravne poslove, naš pravobranilac kaže poštujući mišljenje struke i nauke. Evo i ja ovom prilikom poštujem struku i nauku i zaista bi bilo i besmisleno da ne vjerujem tim ljudima tamo. Ono što je važno napomenuti u ovom trenutku jeste činjenica da ovaj izvještaj kad se usvoji da će on svakako kako je to i gospođica Alibajraktović rekla, on će biti dostavljen višim organima koji će svakako vršiti realnu procjenu svih tih šteta. Ukoliko oni procjene da ima nešto što nije adekvatno i realno procijenjeno, dakle, tu postoji jedan sistem i mi nemamo razloga da ne vjerujemo u to.

Ono što sam i ja htio da pitam, koliko je sredstava utrošeno, odnosno iskorišteno prilikom brze intervencije nadležnih iz Službe CZ u ovim prvim danima 13.,14., pa i kasnijim danima. Znam da se efikasno prontno reagovalo i da je u narednih nekoliko dana „da su mašine bile na terenu“, ljudi su bili na terenu i ne bi bilo loše da imamo tu informaciju da se zna da općinski Budžet i mi ovdje jesmo svakako učestvovali u toj brznoj sanaciji, intervenciji od šteta, onoliko koliko je to u realnoj mogućnosti i realnosti. Ja se slažem sa prijedlogom Kluba SDA da se trebaju utvrditi prioriteti i kriteriji u naknadi šteta u pomoći kako fizičkim i pravnim licima, tako naravno i u sanaciji i prioritetnom saniranju infrastrukture, iunfrastrukturnih putnih i vodovodnih objekata, ali isto tako i na poljoprivrednim imanjima. I u tom smislu ja i predlažem da za narednu sjednicu Općinskog vijeća imamo jednu Informaciju u kojoj će nam se i napisati po kojim prioritetima se vrši to.

Ono što bih ja predložio, smatram lično sve je za diskusiju, da su preuranjeni zahtjevi Klub SDA za rebalans Budžeta iz prostog razloga što nama tek slijedi ta pravna proceduralna bitka za što veća sredstva, da dođu ovamo i da se te štete saniraju. Mi ovdje moramo postaviti pitanje, zašto kanton, kantonalna Vlada, odnosno kantonalni štab CZ nije proglasio stanje prirodne nesreće na Kantonu iako se zna, iako su bili u obavezi da ga proglase zato što u pitanju nije samo jedna općina ili dio općine, nego su u pitanju više općina koje su proglasile stanje prirodne nesreće. Tešanj, Usora, Doboj-jug, Maglaj, tako da mislim da je ovo dobro pitanje. Ja sam već sugerisao kolegama poslanicima u DF da postavite to pitanje a i vama sugerisem da pristupite zašto to nije urađeno. Dakle, ono što također smatram i predlažem da se prilikom intervencije u sanaciji ovih šteta, pokuša maksimalno iskoristiti ono što smo mi redovno planirali u Budžetu za određene stvari, a mislim da tu Načelnik, odnosno Služba i administracija imaju dosta prostora da prilikom određivanja jednokratnih pomoći, prilikom realizacije programa

održavanja cesta, programa poticajnih mjera u poljoprivredi itd. stavi jednu stavku ili se pridržavaju neke stavke, a to je da prednost imaju i oni koji su poplavljeni, oštećeni itd.

Dakle, kad se to sve sabere i oduzme, mi ćemo znati nakon nekog vremena imal potrebe uopšte ili nema, a naravno očekivat je i imam također informaciju da je Vlada Kantona donijela nedavno jednu odluku o izdvajanju interventnih sredstava. Koliko će oni biti operativni, kolika sredstava, u ovom trenutku je zaista rano govoriti o cijeloj toj priči. Zbog toga i smatram da je preuranjeno govoriti o Budžetu, ali svakako se može na ovaj način.

Predlažem da jedan od zaključaka bude : **da se** do kraja jula pripremi informacija o stepenu ugroženosti od prirodnih nesreća da imamo to, na kraju to je i obaveza po godišnjem planu i programu, a kako bi smo, naravno ovo je najvažnije, sigurno najviše građane interesuje naknada šteta, ali svakako mi ne smijemo zaboraviti taj sistem a to je da nastavimo još efikasnije, bolje i jače da radimo na prevenciji, a tu imamo dosta prostora. Ne bih volio da sad ovu tačku pretvaram u tu tačku, pa ću vrlo kratko samo da pomenem taj jedan od zaključaka koji bi nam bio povod da malo razgovaramo o tome. Vidim ja tu bez obzira što su članovi stručnih komisija i inspekcije itd. naravno i sve u Službi koje imaju i te kako obaveza kad su u pitanju ove preventivne aktivnosti i mjere, pa da to bude do kraja ljeta tačka na dnevnom redu, **Informacija o stepenu ugroženosti općine Maglaj od prirodnih nesreća.**

Također moram još jedanput da ponovim, kad je bila prošla informacija, kad se bude prioritetno sanirana ova infrastruktura i kad se već bude radilo, svi ste vi u Službi upoznati da je vrlo teško stanje kad je u pitanju ono gore korito rijeke Fojničanke da je tamo nekoliko kuća ugroženo, poljoprivredna imanja, kad je u pitanju i vodovod, „Duba“ u Kopicama, a isto tako i kad je u pitanju ova infrastruktura, infrastrukturni objekat u Tujnici i onaj most. Naravno to su samo neki od ovih prioriteta, ali ovo su realni prijedlozi, smatram da su sasvim realni, objektivni i još jedan put ponavljam, prihvatit ću ovaj Konačni izvještaj o štetama.

Vijećnik Mustafa Bešić, i naš će Klub podržati ovaj Konačni izvještaj o procjeni šteta uzrokovanih obilnim padavinama – poplave i klizišta dana 13.05.2019.godine.

Ono što sam našao u materijalu, procijenjena šteta na Novom Šeheru, Domislica putna komunikacija Brezove Dane. Želim da vas obavijestim da sam ja prije mjesec i po dana prijavio štetu, radi se o mostu gore i vjerovatno da je i taj mosta ušao i taj most je stradao prilikom klizišta od vode u ovoj šteti. Pa bih želio da upoznam da je on jako značajan i da je od prioriteta gore. Gore je trebala da se održi tradicionalna misa u ponedjeljak, ljudi svake godine to obilježavaju, koji su živjeli na tom dijelu. Međutim, zbog mogućnosti pošto most nije popravljen, neće se moći održati to, znači bit će samo na groblju obilježeno to i ovim putem sugerisem da se pomogne. Nama je taj most jako bitan i za našu MZ jer gore žive povratnici Srbi i Hrvati, a i nama mještanima n/m Domislica jako bitno. Sugerisem da uđe to u prioritete.

Ne mogu da ne komentarišem Šeher poligon, pa ljudi moji nemojte, nije u redu. Pa ko je prouzrokovao štetu u Liješnici, ako je u Novom Šeheru poligon, šta se desilo u Liješnici? Šta je problem u Domislici što je izašla voda cijelom dužinom? Šta je problem u Čobama? Nemojte tako, nije u redu, nije korektno.

Vijećnica Selma Avdić, samo jedno pitanje, ako ste prije mjesec, mjesec i po izašli na teren i sad pominjete taj most kako možete ga tek sad spominjati, a nije se poplava desila.

Vijećnik Mustafa Bešić, prije dva mjeseca sam uputio dopis i vjerovatno ne znam ja da li je u ovom Izvještaju naveden.

Predsjedavajuća, Načelnik je rekao da će ponuditi odgovor.

Načelnik općine, vrlo kratko ću se osvrnuti iako ja nisam bio niti dio komisije niti sam te struke. Predsjednik komisije je Alibajraktarević Senada koja je ovdje iznijela neke informacije, ali nisam isključen iz procesa i vladam informacijama. Žao mi što ne možete smoći snage, obraćam se Klubu SDA, da budete makar jednom korektni kad se radi o ovim štetama, kad se radi o ljudima koji su oštećeni. Iznosite ovdje niz laži, igrate se s poligonom. Poligon napravljen na zemljištu koje je bilo završeno, ko je poplavio iza poligona, o čemu pričate. Poplavljeno i prije gore od Kopica pa nadalje, ali to su te zle namjere. Nemojte iznositi laži da je MZ tražila, tražio je SDA u MZ Liješnica, došao predsjednik MZ i kaže bilo nas šest, ona tri koja je vaš šef poslo da donesu kojekakve zaključke kao MZ, nisu donijeli nikakve zaključke. Tri – tri, pa ljudi malo pod strahom donijeli papir koji nisu smjeli ni izpečatiti. Dakle, to vam je politizacija, apsolutno iznošenje neistina. O kojem rebalansu pričate, rebalans za klizišta, pogledajte u Budžetu šta imate predviđeno za klizišta, pogledajte šta imate predviđeno za projekte, pa onda o tome pričajte. Pričate o raspodjeli, nemojte buniti ni vi, ni vi iz SDP-a. nemojte buniti građane o podjeli sredstava. Podjela sredstava oštećenim licima mogu biti kada budu sredstva odobrena kao što je bilo i 2014.godine. Za one koji su zaboravni, Federalna Vlada je 2014.godine oformila Fond za pomoć stradalim u poplavama koji je funkcionisao i koji je upravljao sredstvima prikupljenim i dodijelio Maglaju milione. Između ostalog se ovdje vodila bitka dugo vremena da se pomogne građanima i hvala Bogu da smo uspjeli izvojevati tu bitku. Ako sredstva budu dostavljena sa viših nivoa za tu namjenu usvojiti na Vijeću kakve god hoćete kriterije, podijelite, ja ne mislim niti mogu nosati taj novac u džepu i dijeliti ja kako hoću. Dakle, 2014.godine Vijeće usvojilo kriterije, jesu oni dobri ili nisu, to zavisi od lične percepcije, prihvaćanja, ali su usvojeni takvi kakvi su i po njima se postupalo.

Informacija kako je proglašena, pa onda pomiješate klizišta, pa pomiješate poplave, pa padavine, nije kaže u Jablanici bila poplava, pa nije padala ni kiša, nije ni u Galovcu padala kiša, nije snijelo put. Pričate stvari koje

niste provjerili, otiđite na teren. Na kraju ima Komisija koja je za putnu infrastrukturu, neka izade ovdje poslije mene i neka kažu šta su zatekli na terenu. Ali jednu stvar morate shvatiti, razlika je između štete nastale na terenu i iznosa koji treba da to vrati u početno stanje je puno veći iznos. Nisam dobro rekao, ne u početno stanje, kad radite ne možete dovesti firmu i dovesti u početno stanje kakvo je bilo, ovdje je odnijelo, ostavi onu rupu, morate onu dionicu sanirati, treba predvidjeti sredstva za kompletnu dionicu. Ne zaboravite da 2014. godine bila procjena 166 miliona. Provjerite koliko je miliona došlo. Sad imamo 3 miliona i nešto i vidjet ćete koliko ćemo dobiti za sanaciju. Što se tiče prioriteta, naravno da će se raditi po prioritetima i da se radi po prioritetima.

Evo opet zle namjere izdvojeno 10.000,00 KM za rad komisije. Nije izdvojeno, niti će biti izdvojeno za rad Komisije, ali zakonska forma popunjavanja svih troškova u ovakvim slučajevima je između ostalog i cijena rada ljudi koji rade te aktivnosti. Vi imate pet komisija, pored komisija imate još mnoštvo uposlenika u Općini Maglaj koji su sve ove dane radili na ovim aktivnostima, imate troškove goriva i svega to moramo prikazati. Nećemo mi reći da radimo u Općini Maglaj đaba, ne radimo đaba, mi primamo plaće kao što primaju i u drugim općinama. Ali to nisu sredstva namijenjena koja će se sutra članovima Komisije podijeliti, ko će dati 20.000,00 KM članovima Komisije evo vam dijelite novac. Ne, to su troškovi koji su nastali u Općini Maglaj da se završi ovaj proces. Najbolje bi bilo izgleda ne raditi ništa pa da se može pucati po Načelniku, po vijećničkoj većini itd. Sve ove MZ koje su navedene u proglašenju prirodne nesreće su zahvaćena ili poplavom ili klizištem ili su velike padavine napravile eroziju putne infrastrukture itd. Sve je to snimljeno u zatečenom stanju na licu mjesta. Ko ne vjeruje neka ode i neka to provjeri. Iskreno i ja kad sam pogledao izvještaj za neke putne pravce sam se pitao i za Jablanicu, prema Ravni, čak sam tražio da izbrišu, valjda tako struka nalaže kad uzme putni pravac od prve do posljednje tačke, bez obzira na kojoj dionici se desio problem, pa je pisalo Misurići-petlja- Ravna, izbrišite tu petlju, pa nek stoji Misurići-Ravna, jer zaista od petlje do tamo negdje prema Ravnoj nije bilo nikakve štete. Put u redu ali se piše putni pravac, piše njegova dužina i piše šteta koja je nastala na tom putnom pravcu.

Koliko je utrošeno tokom brze intervencije to bi trebala gospođa Alibajraktarević potvrditi. Koliko sam ja u hodu vidio da i ta stavka stoji u ovoj tabeli. Tabela 7 ćete naći troškove koji su do sad bili na sanaciji i naravno sanacija je u toku. Dio ovih aktivnosti kako je pomenuo podpredsjedavajući, mi svakako smo već isplanirali iz ugovora koji imamo za radove promijeniti pojedine lokacije koje nisu prioritetne, odraditi ove koje su prioritetne. To nije nikakva nepoznanica. Ovo što je tražio Klub SDA ove informacije, nije to problem da dobijete do naredne sjednice. Danas imate tačku dnevnog reda Izvještaj o nastalim štetama koji se sačinio u zakonskoj formi. U zakonskoj formi nemate imena šupa, kokošinjaca itd. Imate tabele koje možete, ako ne vjerujete meni otvorite na internetu pa ćete vidjeti zakonske forme tabela kako su i popunjene. Što se tiče Vlade ZDK, ja imam informaciju da je usvojen određeni plan utroška sredstava kad je u pitanju Civilna zaštita, ali to još uvijek ništa nije spušteno na lokalne nivoe. Mi u ovom trenutku još uvijek nemamo nikakve zvanične informacije, niti od Vlade ZDK, niti od Federalne Vlade, niti od Kantonalne uprave CZ, niti od Federalne uprave CZ, a niste našli to nigdje ni na portalima za bilo koju općinu koja je stradala u ovom periodu ili da se pojavilo, i oni rade i oni čekaju ove izvještaje itd. tako da će se desiti. Mi smo prošle godine imali poplavu u maju. Sredstva odnosno Odluku o dodjeli sredstava Fed.uprave CZ dobili tek polovinom 11-og mjeseca. Neće biti bolja slika ni ove godine jer je to procedura koja tako traje. Nije u našoj moći da je mi mijenjamo. Da li je stadion uračunat? Vodovod „Duba“ itd. ja znam i sve što je prijavljeno i viđeno da je uračunato, treba da je uračunata i šteta na stadionu i na onom objektu „klubama“ pokraj stadiona.

Što se tiče vodova „Duba“ i to koliko ja znam, ova ekipa koja je preuzela vodovod da je već napravila određene pozitivne korake da se popravio kvalitet vode, bez nekih značajnih ulaganja, pa mi nije jasno zašto to i ranije nije bilo, a isto tako znam da su kod šefa Službe za urbanizam boravila ekipa koja vodi vodovod „Duba“ i koji su iznijeli određene sugestije, zahtjeve i znam da su sa gospodinom Hajrulahovićem određene stvari i dogovorili, a što se tiče ovih ostalih informacija pripremit ćemo ih za narednu sjednicu. One nisu dio današnje tačke i da đaba o tome ne raspravljamo.

Fojnica, mislim da je trebao jučer da dođe čovjek da vidi koja mašina može sići, moguće da je jutros otišao, rekao je da mu ne treba niko, to je isto tako evidentirano, stavljeno u prioritet, treba riješiti onaj dio. Treba možda već i informacije šta građani kažu ono ranije kako je urađeno i šta je uzrok ono što se sad desilo, ali da i ja ne politiziram, iako su konkretne činjenice.

Bešiću, most jeste prijavili ste vi čim se desilo to, most je uzet u obradu u resornoj službi. Nisu urađene nikakve interventne mjere i ne mogu biti urađene nikakve interventne mjere, ondje nema sanacije ondje treba napraviti nešto čestito i konkretno. Ono što znam, znam da postoji određena zaobilaznica koja se u ovom trenutku koristi i hvala Bogu da je tako da ih imamo, inače bi kakvo je stanje na terenu, onaj gore kraj bio u potpunosti odsječen.

Vijećnik Safet Jašić, replika – mi ne lažemo, to je istina.

Pauza za Klub SDA

Vijećnik Safet Jašić, Klub SDA je donio jedan zaključak u cilju zaštite građana i privrednih subjekata koji su stvarno pogođeni ovom elementarnom nepogodom od 13.05.2019.godine, Klub vijećnika SDA ne može prihvatiti ovaj Konačni izvještaj.

Pauza Klub SDP i koalicioni blok

Vijećnik Hajrudin Fermić, - replika – replika je na prijedlog zaključka Kluba, odnosno Klubu. Tako je sročena da kaže u cilju interesa zaštite građana itd. pa neće prihvatiti izvještaj. To znači da mi koji budemo glasali da prihvatamo izvještaj ne radimo u interesu građana. Naprotiv moj motiv je da baš u interesu građana i svih onih koji su stradali u ovim prirodnim nesrećama, da moramo i da trebamo donijeti ovaj izvještaj, jer bez Izvještaja apsolutno smo nemoćni da tražimo bilo kakva sredstva od svih drugih viših organa vlasti, nadležnih a isto tako i međunarodnih institucija. Prema tome, to je replika samo zbog javnosti da se razluči.

Vijećnik Safet Jašić, replika – ja sam rekao decido i jasno u cilju stvarno oštećenih građana, infrastrukture i privrednih objekata, stvarno oštećenih, to je razlika. Replika na vašu repliku gospodine dopredsjedavajući.

Predsjedavajuća, zaključujem raspravu i dajem na glasanje prijedlog

ZAKLJUČAK

1.1. Usvaja se Konačni izvještaj o procijenjenoj šteti uzrokovanoj obilnim padavinama – poplave i klizišta dana 13.05.2019.godine, uz sve realne sugestije i prijedloge koji su u skladu sa zakonom.

Glasalo 13 glasova za: Svjetlana Zamboni, Nedžad Lokmić, Mirza Bradarić, Anida Šahman, Irena Herceg, Firuz Galijašević (SDP), Muhamed Hrnjić (SBB), Elvir Vehabović (SBiH), Hajrudin Fermić (DF), Mustafa Bešić, Fikret Delić, Kanita Bašić samostalni vijećnici, Josip Jurišić (HDZ),

Glasalo 11 protiv : Adis Abdurahmanović, Nedžad Alispahić, Selma Avdić, Mirsad Bežić, Delić Edib, Hasanić Šefka, Safet Jašić, Edina Jašić, Smajlović Dženita, Ermina Muminović (SDA), Mustafa Buljubašić, samostalni vijećnik.

Vanredna sjednica završena u 10,30 sati.

Zapisničar,
Nisveta Bašić

